

Siunnersuut: Efterskolit pillugit Inatsisartut inatsisaat nr. Xx, xx-meersoq

Kapitali 1

Nassuiaat siunertarlu

§ 1. Efterskole tassaavoq suliffeqarfik imminut pigisoq, atuartitsinermik ataatsimoorinissamillu neqerooruteqartoq, ilinniartut inuttut tamakkiisumik inerikkiartornissaat, kiisalu nalinginnaasumik perorsarneqarlutillu ilinniarnissaat siunertaralugu qaammarsaanermik demokratiilu tunngavigalugu peroriartornissamik pingaarnertut anguniagaqartoq.

Imm. 2. Atuartitsineq neqeroorutaasoq tamatigoortuussaaq. Efterskolit ingerlatsinerat namminneq pingaartillugu tunngavissamittut toqqagaat aallaavigalugu aaqqissuunneqassaaq. Atuartitsissutit ataasiakkaat imaluunniit atuartitsissutit qanitariissut pingaartinneqarnerullutik inissisimasinnaapput, kisiannili nalinginnaasumik perorsaaneq ilinniartitaanerlu taarsernagit.

Imm. 3. Efterskole Inatsisartut inatsisaannut matumunnga ilaasutut isigineqassaguni Naalackersuisunit akuerisaasariaqarpoq, tak. § 7, imm. 1.

Imm. 4. Efterskolit, ilinniartunik atuarfik pillugu peqqussut naapertorlugu atuartitaasussaataasunik ilinniartortaassagunik, ilinniartunut taakkununnga atuartitsineq nalinginnaasumik meeqqat atuarfianni piumasaqaataasunut nallersuussinnaasoq neqeroorutigissavaat.

Imm. 5. Ilinniartut atuartitaasussaataasut atuartitsinermik, meeqqat atuarfianni inaarutaasumik naliliinernut misilitsinnernullu qaqugukkulluunniit atuuttunut piareersaataasinnaasumik, neqeroorfigineqassapput.

Imm. 6. Ilinniartut ukiumikkut atuartitaasussaataajunnaareersut atuartitsinermik, meeqqat atuarfianni inaarutaasumik naliliinernut misilitsinnernullu qaqugukkulluunniit atuuttunut piareersaataasinnaasumik, neqeroorfigineqarsinnaapput.

Imm. 7. Naalackersuisut efterskolip pisortaa pisinnaatissavaat, meeqqat atuarfianni inaarutaasumik naliliinerit misilitsitsinerillu pillugit malittarisassat qaqugukkulluunniit atuuttut naapertorlugit, inaarutaasumik naliliinernik misilitsinnernillu ingerlatsisinnaatillugu.

Imm. 8. Naalackersuisut efterskolip inaarutaasumik naliliinernik misilitsinnernillu qaqugukkulluunniit atuuttunik ingerlatsisinnaanera atorunnaarsissinnaavaat, efterskolip malittarisassat taakku pillugit qaqugukkulluunniit atuuttut maleruanngippagit.

Kapitali 2

Ilinniartussanik akuersineq

§ 2. Efterskolit ilinniartut efterskolertussatut akuerisassavaat.

Imm. 2. Efterskolit oqaaseqaateqartereernerisigut qinnuteqarnermi aamma ilinniartussanik akuersinermi periusissat Naalakkersuisut aalajangersarsinnaavaat.

§ 3. Efterskolini ilinniartut ukiuni 8-ni atuarnertik naammassisimassavaat imaluunniit 14-inik ukioqalereersimallutik 18-inillu ukioqalereersimassanatik.

Ilinniartut 18-inik ukioqalereersimasut immikkut pisoqartillugu peqataatinneqarsinnaapput, malittarisassat Naalakkersuisunit aalajangersarneqartut naapertorlugit.

Pisortaqarneq

§ 4. Efterskolit suliffeqarfittut imminnut pigisutut ingerlanneqassapput, qullersaallutillu aqutsisut tassaassallutik siulersuisut.

§ 5. Siulersuisut efterskolip ingerlatsinera piffissarlu ungasinnerusoq eqqarsaatigalugu ineriartornissaa pillugu tunaartarisassanik aalajangersaassapput. Siulersuisut sammisassanut pilersaarutit aalajangersassavaat, taakkualu siunertamut, tak. § 1, naapertuuttuunissaat akisussaaffigalugu.

Imm. 2. Siulersuisut efterskolip pisortaa atorfinitsillugulu soraarsittarpaat.

Imm. 3. Siulersuisut efterskolip ileqqoreqqusaa suliarissavaat, siulersuisullu ingerlatsinermi suleriaassissaat aalajangissallugu.

§ 6. Pisortaq perorsaanermtut tunngasunut akisussaavoq efterskolillu ulluinnarni aqutarinera isumagalugu. Pisortap qularnaassavaa, efterskolip ingerlatsinermi malittarisassat tamanna pillugu atuuttut tunaartarisassallu siulersuisunit aalajangersakkat naapertorlugit aqunneqarnissaa.

Imm. 2. Pisortap efterskolimi suleqataasut atorfinitsillugillu soraarsittarpai.

Kapitali 3

Efterskolinik akuersineq

§ 7. Naalakkersuisut efterskole akuerisinnaavaat

1) efterskolip ileqqoreqqusaa Naalakkersuisunit akuerineqarsimappat aamma

2) efterskole naapertuuttunik inissaqarlunilu naapertuuttunik atortoqarpat.

Imm. 2. Efterskolip ileqqoreqqusaa makku pillugit paasisutissanik imaqassaaq:

1) Suliffeqarfiup imminut pigisup taaguutaa.

2) Kommune, suliffeqarfiup imminut pigisup najugaqarfigisaa.

3) Suliffeqarfiup imminut pigisup siunertaa.

4) Suliffeqarfiup imminut pigisup pigisaasa pilersinneqarnerminilu imminerisaminik aningaasaataasa annertussusaat.

5) Pilersitsisuusup allalluunniit immikkut pisinnaatitaaffii iluaqutissarisaaaluunniit.

6) Siulersuisunut ilaasortat katitigaanerat amerlassusaallu, qanoq toqqarneqartarnerat piffissallu atuuffiisa sivisussusaa.

7) Naatsorsuuserinermut malittarisassat.

8) Sinneqartoorutit atornissaat.

Imm. 3. Efterskolit siulersuisuisa ukiumi efterskolip aallartiffissaatut pilersaarutaasumi kingusinnerpaamik 1. marts ileqqoreqqusat akuerisaasut Naalackersuisunut nassiutereersimassavaat.

§ 8. Naalackersuisut akuersissut atorunnaarsissinnaavaat, efterskolip § 7, imm. 1-imi piumasaqaatit eqquutissinnaajunnaarpagit. Aammattaaq naalackersuisut akuersissut atorunnaarsissinnaavaat, efterskolip atuartsinera pissutsillu allat, § 1-imi aalajangersakkanut ersarissumik akerliusutut isumaqarfigineqarpata.

Imm. 2. Imm. 1-imi oqaaseqatigiit aappaat naapertorlugu akuersissummik atorunnaarsitsineq taamaallaat pisinnaavoq, iliuitsit annertunnginnerusut misilinneqareersimappata.

Kapitali 4

Efterskolinut tapiissutit

§ 9. Efterskolit Inatsisartut inatsisaat manna naapertorlugu tapiiffigineqarsinnaassagunik Naalackersuisunit akuerisaassapput, tapiissuteqartarnermullu piumasaqaatit piviusunngortissimassallugit, tak. §§ 10 - 11.

§ 10. Inatsisartut Aningaasanut Inatsisaanni aalajangersarneqartut iluanni Naalackersuisut, efterskolinut akuerisaasunut tapiissuteqartarput (tunngaviumik tapiissutit, taxameteri malillugu tapiissutit, ilinniartut akiliutaasa annikillisinnissaannut isertitat aallaavigalugit tapiissutit) piumasaqaatit makkua aallaavigalugit:

- 1) Efterskolit pisortaat ilinniartitsisuiulu akissaateqartinneqassapput Naalackersuisut isumaqatigiissuteqarfigisinnaasaasa iluanni atorfiit assingusut pillugit aalajangersakkat naapertorlugit. Atorfininnermi atugassarititaasut allat allakkatigut isumaqatigiissutitineqassapput.
- 2) Efterskolip Naalackersuisunut uppersassavaa atuarfiup pisortaata ilinniartitsisuisalu naammaginartumik soraarnerussutisiassaqaarnissaasa qularnaarneqarnera.
- 3) Siulersuisut ukiumoortumik nalunaarussiaq, naatsorsuutit kukkunerisukkanik aamma aningaasartuutissat isertitassallu missingersersuusiomerannik ilaqqortoq Naalackersuisunut nassiutissavaat.
- 4) Efterskolip ingerlassassanik pilersaarutai Naalackersuisunit akuerisaassapput.

§ 11. Inatsisartut Aningaasanut Inatsisaanni aalajangersarneqartut iluanni Naalackersuisut efterskolinut tapiissuteqartarput,

- 1) tapiiffigineqarsinnaasumik sapaatip-akunnerini 40-ni atuartsinermik ingerlatsisoqarpat,
- 2) atuartsineq efterskolernertut aqqissuunneqarpat,
- 3) efterskolernerit tamarmik minnerpaamik sapaatip-akunnerinik 40-nik sivissuseqarpata, aamma
- 4) tapiiffigineqarsinnaasumik atuartsinermik ingerlatsinerup iluani ukioq naallugu ilinniartut minnerpaamik 24-uppata.

§ 12. Naalackersuisut efterskolinut ataasiakkaanut ukiumoortumik tunngaviusumik tapiissuteqartarput, ukiut tamaasa Inatsisartut Aningaasanut Inatsisaanni aalajangersarneqartunik.

§ 13. Naalackersuisut taxameteri malillugu tapiissuteqartarput, efterskolip ukiumut ilinniartuisa amerlassusaat kisitsimmik, ukiumoortumik Inatsisartut Aningaasanut Inatsisaanni aalaajangerneqartumik, amerlisarnerat aallaavigalugu.

Imm. 2. Efterskolip ukiumoortumik ilinniartuisa amerlassusaat tassaavoq, ukiumi ataatsimi sapaatip-akunnerini pikkorissarfiusuni ataasiakkaani, ilinniartut amerlassusaasa katinnerat 40-mik agguarlugu. Sapaatip-akunnera pikkorissarfiusoq tassaavoq ullut-unnuallu pikkorissarfiit 7-it.

Imm. 3. Efterskolinut pilersinneqarlaanut, sulilu ukioq aningaasanut inatsisiliorfiusoq sioqqullugu taxameteri malillugu tapiiffigineqanngitsunut, ilinniartut akuerisatut aalajangikkat amerlassusaat aallaavigineqassaaq.

Imm. 4. Naalackersuisut efterskolinut taxameteri malillugu tapiissutit naatsorsornissaat, tunniunnissaat aqutarinissaallu pillugit malittarisassanik aalajangersaasinnaapput, taakkununga ilanngullugit ukiumoortumik ilinniartut ikinnerutillugit sapaatip-akunnerisalu atuartitsiviusut ingerlanneqartut ikinneruneranni taxameteri malillugu tapiissutit ikilisinnissaat pillugit aalajangersakkat.

§ 14. Ilinniartut efterskolinut akiliutissaasa annikillisinnissaannut, isertitat aallaavigalugit aalajangerneqartunik, Naalackersuisut tapiissuteqartarput. Tapiissutit inummut ataatsimut tapiissutitut, Naalackersuisunut ilinniartup akiliutaata appartinneqarnissaanik qinnuteqartoqareerneratigut, tunniunneqartarput. Ilinniartunut tapip annertussusissaa ukiumoortumik Inatsisartut Aningaasanut Inatsisaanni aalajangerneqartassaaq.

Imm. 2. Ilinniartup akiliutaanik annikilisaanissamut tapiissutit efterskolimut tunniunneqassapput.

Imm. 3. Naalackersuisut aalajangersinnaavaat ilinniartunut tapiissutit allaffissornikkut aqutarinerat kommunalbestyrelsimit isumagineqassasoq.

Imm. 4. Naalackersuisut aalajangersinnaavaat, ilinniartunut tapit Namminersornerullutik Oqartussat ataanni suliffeqarfimmit immineertumit allaffissornikkut isumagineqassasut, ilinniartunullu tapit allaffissornikkut ingerlannissaannut pisussaaffiliisinnaallutik.

Imm. 5. Ukiumoortumik Inatsisartut Aningaasanut Inatsisaanni skalatut aalajangerneqassaaq, isertitatigut tunngaviusut isertitallu aallaavigalugit ilinniartumut tapip aningaasartaasa akornanni naleqqiussissutissaq. Angajoqqaat isertitamikkut tunngaviisa appartinnissaat aalajangersarneqassaaq, ilinniartup efterskolernerup aallartinnerani qatanngutaasa 18-it inorlugit ukiullit amerlassusaat aallaavigalugu.

Imm. 6. Isertitatigut tunngaviusoq tassaavoq, ullorsiutit malillugit ukiumi piffissap tapiiffiusup aallartiffiata siornatigut ukiut aappaanni, nammineerluni isertitarisat annertussusaat.

Imm. 7. Naalackersuisut isertitatigut tunngaviusoq imm. 5-imi taaneqartoq sanioqqussinnaavaat, angajoqqaat uppersarsinnaappassuk malunnaatilinnik isertitatigut allannortoqarsimanera.

§ 15. Naalakkersuisut efterskolernerup aallartinnerani ilinniartup angerlarsimaffianiit efterskolimut angalaneranut aamma kipitinnerani naammassineranilu efterskolimiit angerlarsimaffianut angalanermi aningaasartuutit akilissavaat.

Imm. 2. Qanigisat perulunneranni imaluunniit toquneranni angerlarsimaffimmut utimullu ilinniartup angalaneranut aningaasartuutit Naalakkersuisut akilissavaat.

Imm. 3. Tapiissutit imm. 1 aamma 2 naapertorlugit tunniunneqartut efterskolimut aningaasartuuteqartuusumut tunniunneqassapput.

§ 16. Efterskolit pisortaasa ilinniartitsisuisalu ilinniartuarnissaat siunertaralugu pikkorissaanernut Naalakkersuisut tapiissuteqarsinnaapput.

Imm. 2. Pisortat ilinniartitsisullu ilinniaqqinnerminni piffissap ilaa tamakkiisumilluunniit sulingiffeqartut akissarsiaqartinnerinut Naalakkersuisut tapiissuteqarsinnaapput.

Imm. 3. Tapiissutit imm. 1 aamma 2 naapertorlugit tunniunneqartut efterskolimut aningaasartuuteqartuusumut tunniunneqassapput.

§ 17. Immikkut atuartitsinermut aamma allatigut immikkut perorsaanikkut ikiorsiinissamut tapiisarnissaq pillugu Naalakkersuisut malittarisassaliorsinnaapput.

§ 18. Efterskolit siunertamik iluanni Naalakkersuisunit tapiissutit isertitallu allat ataatsimut isigalugit atorinissaat namminneq aalajangersinnaavaat. Taamaattoq piumasaqaataavoq atuartitsinerup tapiiffigineqartup, malittarisassat atuuttut naapertorlugit atuartullu tapiiffigineqartut amerlaqataannut ingerlanneqarnissaa.

Imm. 2. Efterskolit aningaasaliissutit atorineqanngitsut ukiup naatsorsuiffiusup tullianut nuussinnaavaat.

§ 19. Naalakkersuisut tapiissutinik utertitsinissaq unitsitsinissarlu pillugit malittarisassanik aalajangersaasinnaapput.

Kapitali 5

Kalaallit Nunaata avataani efterskolernermit tapiissutit

§ 20. Naalakkersuisut Danmarkimi efterskolernermit atatillugu aningaasartuutitut tapiissuteqarsinnaapput, tassunga ilanngullugit ilinniartut akiliutaasa annikillisinnissaannut tapit, kiisalu ilinniartut angalanerinut aningaasartuutit akilissallugit, tak. § 15, imm. 1 aamma 2. Tapiissutit tamarmiusut annertussusaat ukiut tamaasa Aningaasanut Inatsimmi aalajangerneqartarput.

Imm. 2. Naalakkersuisut Danmarkimi efterskolernermit tapiissutit tunniunneqarnissaat pillugu malittarisassanik aalajangersaassapput, tassunga ilanngullugit tapiisarnissamut piumasaqaatit, tapiissutit annertussusaat, qinnuteqarnermi periusissat aamma maalaarnissamut aqutissat.

Kapitali 6

Aalajangersakkat assigiinngitsut

Nakkutilliineq

§ 21. Naalakkersuisut efterskolit nakkutigissavaat, siunertamullu tassunga pisariaqartunik paasissutissanik piniarsinnaallutik.

Misileraalluni ingerlatsineq

§ 22. Naalakkersuisut Inatsisartut inatsisaanni aalajangersakkat sanioqqussinnaavaat, taamaaliornissaq Inatsisartut inatsisaata iluani misileraalluni ingerlatsinissap siuarsarnissaanut pisariaqartinneqarpat.

Atuuttuulernermik atorunnaarsitsinermillu aalajangersakkat

§ 23. Inatsisartut inatsisaat atuutilissaaq 1. januar 2009.

Imm. 2. Ilutigisaanik atorunnaarsinneqarput Meeqqat atuarfiat pillugu Inatsisartut peqqussutaanni nr. 1, 6. juni 1997-imeersumi § 10, imm. 5 aamma § 11.

Imm. 3. Inatsisartut peqqussutaat, imm. 2-mi eqqaaneqartoq, Meeqqat atuarfiat pillugu Inatsisartut peqqussutaat nr. 1, 6. juni 1997-imeersoq, naapertorlugu malittarisassat aalajangersarneqarsimasut imaluunniit attanneqartut atorunnaarsinneqarnissamik imaluunniit Inatsisartut inatsisaat manna allaluunniit naapertorlugu aalajangersakkanik taarserneqarnissamik tungaannut atuutissapput.

Namminersornerullutik Oqartussat, xx. Xx xxxx.

Hans Enoksen

/

Tommy Maru